

Guangjisi Minzcu Bau

ganhhau: CN45-0036 B.2017 Nd.11 Ng.29 liggaeuq dingyoux nienz ndwencib cibngeih

广西民族报

(壮文版)

主办:广西区民语委

出版:广西民族报社

出版周期:逢星期三出版

出版期数:总第3301期

Aen Canjlanj Gij Cingzcik Hong Doihengz Sawcuengh Geiqniemh 《Fueng'anq Sawcuengh》Fatbouh 60 Hopbi Youq Namzningz Banh 纪念《壮文方案》颁布 60 周年壮文推行工作成就展在邕举行

Bonjbauq siusik(gicej Cau Dwzfeih) Ndwen 11 ngoenz 24, aen canjlanj gij hong doihengz Sawcuengh geiqniemh Gozvuyen fatbouh 《Fueng'anq Sawcuengh》60 hopbi youz Swcigih Gyauyuzdingh, Swcigih Minzyijveij, Namzningz Si Yinzminz Cwngfuj cawjbanh haenx youq Guengjsae Duzsuhgvanj haimuq.

Baez canjlanj neix muzdiz dwg doeksaed gij cwngcwz saw vah minzcuz dangj caeuq guekgya raeuz, senhconz gvancez gij cingsaenz Cibgouj Daih, gyoebcomz langhbaij gij cingzcik hong Sawcuengh 60 bi daeuj youq gij cwngcwz gagguenj gizdieg minzcuz dangj raeuz ciuqrongh lajde aeundaej haenx, langhbaij gij gojgaeq Guengjsae gamjdoengh vunz ndei yawj haenx, hawj gyoengq vunzlai gyalai

roxyiuj saw vah minzcuz, coicaenh gak minzcuz dox hag saw vah, coicaenh gak minzcuz dox baedauq doxgyau doxyungz, gungganq caeuq cauhaeb gij yisiz Cunghvaz minzcuz gungdungzdi, cauhaeb aen gyaranz cingsaenz caemh miz Cunghvaz minzcuz.

Haimuqsik le, gyoengq boux lingjdauj caeuq bouxhek yawjgonz le canjlanj, Guengjsae Densidaiz bouxcujciz cezmuz Vangz Lili yienhcie ngz guh ganggej.

Gyoengq boux lingjdauj lauxhangz caeuq gak gyaiq vunz cungj naeuz, youq mwh Gozvuyen fatbouh 《Fueng'anq Sawcuengh》ndaej 60 hopbi neix, banh baez canjlanj neix gij youqgaenj caeuq miz yi, ndaej cienzmienh dauqyawj caeuq cingileix gij cingzcik doenghbaez caeuq lizsij

gingniemh, doiq coglaeng haiguh hong doihengz Sawcuengh miz gij cijdauj youqgaenj caeuq gij yi ndaej ciuqhag, hix yaek doiq gih raeuz caenh'itbough cauhaeb gij saedceij vahgangj lai cungj vah huzndei, gyagiengz minzcuz doxgi, coicaenh dieg Bouxcuengh ginghei ndawbiengz cienzmienh cinbu, miz gaenxmaenx cozyung.

Ciuq cam rox, baez canjlanj neix yaek laebdaeb baij daengz ndwen 12 ngoenz 6. Gyoengq siminz ndaej bae Guengjsae Duzsuhgvanj yawj, haeujgyawj roxnyinh gij hwngfat ginglig 60 bi daeuj hong Vahcuengh Sawcuengh Guengjsae mbouj bingzcie ngz haenx, doenggvaq doenghgi doxgaiq gaeuq mbawsiengq gaeuq neix rox gij saeh Sawcuengh hwngfat 60 bi neix.

SIUSIK DINJ 简讯

● Mboengqneix, Denzdungh Minzcuzgiz, Yen Vwnzlenz lienzhab cujci doihvwnzyi haeuj Mbanjcuengh Mbanjyauz senhconz gij cingsaenz Cibgouj Daih. Aenvih yungh vah minzcuz, fwen minzcuz guh senhconz, neiyungz doengsug ngaih rox, ndaej vunzlai angq-coux.

(Veiz Swngfhaz)

● Ndwen 11 ngoenz 23, Ningzmingz Yenveij lingjdauj ganbu bae daengz Mingzgyangh Cin Dunglangz Cunh, yiengq dangjyenz dangdieg gangj gij cingsaenz Cibgouj Daih dangj, gujli dangjyenz ginzcung aen cunh neix giethab gij saedsaeh cunh bonjfaenh, cungfaen yungh ndei gak hangh bangfuz cwngcwz dangj caeuq cwngfuj, roengz-rengz gyalai souhaeuj, yien fwnz doengzcae baenz miz.

(Couh Yizgangh)

● Ndwen 11 ngoenz 22, Hociz Si senhgyangjdonz daengz Lozcwngz ciuhai aenhoih baugau senhgyangj hagsib gvancez gij cingsaenz Cibgouj Daih dangj, caemhcai haeuj mbanj gangj gij cingsaenz Cibgouj Daih dangj, cienz gij singyaem dangj, ndaej daengz beksingq Mbanjmulau angqcoux.

(Mungz Cwnghsw)

● Ndwen 11 ngoenz 22, Sanhgyangh Duncuz Swciyen Minzcuz Gauhcungh banh minzcuz conzdungj diyzuz yindungvei, hagseng daengx hagdangz camgya diuq fouxsaux, foux dohyeh, foux aenvenz caijdangz daengj 8 aen conzdungj diyzuz hanghmoeg doxdax, gyoengq hagseng rox gij yinx-daeuz conzdungj diyzuz hanghmoeg.

(Vuz Lenyinh)

● Geij bi neix daeuj, Yungzsuij Myauzcuz Swciyen yungh gij vunqsik "dangcihbu+gunghsw+ranzungzhoj+gihi", hwngfat ndaem raetmoengngaex. Bineix daeuj ranzungzhoj ndaem raetmoengngaex 2000 lai moux 2780 lai fanh gaiq, seizneix, ranz bingzyaenz laisou 5000 lai maenz, raetmoengngaex gaenq baenz daegsaek canjnieb hawj vunzmbanj dangdieg laisou he.

(Lungz Linzci)



Yungzanh: Fwencuengh Senhconz Gij Cingsaenz Cibgouj Daih Dangj

融安:“壮比”宣传党的十九大精神

Ndwen 11 ngoenz 23, Yungzanh Yen Swdingj Cin banh ciengz vwnzva comzyienj aen cawjdae dwg "Fwencuengh ciengqyienj gij cingsaenz Cibgouj Daih dangj cien Mbanjcuengh", vunzlai dangdieg doenggvaq eu Fwencuengh, senhconz gij cingsaenz Cibgouj Daih dangj caeuq gak hangh bangfuz cwngcwz, leih beksingq cwngcwz dangjveij, cwngfuj dangdieg okdaiz haenx, gujli vunzlai gyalai souhaeuj baenz miz vaiqdi vut gungz. Ndaw doz dwg canghfwen youq gwnz daiz eu fwen.

(Danz Gaijinhg/谭凯兴 Liuz Cwz-liengz/刘泽良)

Hocouh Si Banh Aen Vwnzyi Vanjvei Geiqniemh 《Fueng'anq Sawcuengh》Fatbouh 60 Hopbi 贺州市举办纪念《壮文方案》颁布 60 周年文艺晚会

Youq mwh 《Fueng'anq Sawcuengh》fatbouh 60 hopbi, giethab gij cingsaenz Cibgouj Daih dangj, ndwen 11 ngoenz 21 banhaemh, Hocouh Si Minzcunghveij, Minzyijveij lienzhab Cauhbingz Yen Vangzyauz Cin Dangjveij, Cwngfuj, Cauhbingz Yen Minzcunghgiz youq Vangzyauz Cin Fungli Cunh banh aen vwnzyi vanjvei geiqniemh 《Fueng'anq Sawcuengh》fatbouh 60 hopbi nem aenban daezswng canghfwen Yauzcuz, vih gyoengq vunzlai minzcuz vunznoix daezhawj aen daizheiq langhbaij bonjfaenh he. 30 lai boux canghfwen

minzcuz vunznoix daj sam aen yienh song aen gih daeuj haenx ndang daenj buhvaq minzcuz hwnj daiz biujyienj.

Yienj gofoux 《Fwen Ndei Lumj Raemxdah Seizcin》hainduj le baez vanjvei neix, go Bouxcuengh 《Daengx Guek Caez Hoh Cibgouj Daih》, gofoux Yauzcuz 《Raemx Lae Fwen Angq Coux Hek Daeuj》《Hoh Fung-sou》, diuqfoux Yauzcuz 《Foux-gyongraez Gaeuyienz》daengj, cungfaen langhbaij le gij cingsaenz yienhcie ngz beksingq gak cuz Hocouh gaenx guh maenh'ak, gaenxmaenx doxhwnj; bouxsai gagciengq

《Golauz Buenzvuengz》、Mehmbwk gagciengq 《Angq Ciengq Cibgouj Daih》daengj, langhbaij le gij siengmuengh caeuq gietsim beksingq gak cuz youq laj minzcuz cwngcwz dangj ciuqrongh caez hwnjguh gyaranz gyaunde, caez guh siengmuengh Cungguek. Vanjvei yienhcie ngz lij cap haeuj hoizdap gij cihsiz fap gagguenj dieg minzcuz dem, doenggvaq gij hingz sik vunz cam vunz dap, hawj aen cidu gagguenj dieg minzcuz haeujlaeg simvunz.

(Hoz Vazlanz/何华兰)